

Broj: S1 3 IŽ 025194 17 IŽ
Sarajevo, 16.05.2017. godine

Sud Bosne i Hercegovine u Sarajevu, u apelacionom vijeću sastavljenom od sudija Zvezdane Antonović kao predsjednika vijeća, dr Branka Moraita i Mirsade Džindo, kao članova vijeća, odlučujući o žalbi Ćošković Maria, iz 76233 Domaljevaca, Ul. Matije Gupca broj 1, izjavljenoj protiv rješenja Centralne izborne komisije Bosne i Hercegovine, broj: 06-1-07-1-77/16 od 26.04.2017. godine, radi davanja saglasnosti na Odluku o imenovanju člana Općinske izborne Domaljevac-Šamac, u nejavnoj sjednici održanoj dana 16.05.2017. godine, donio je

R J E Š E N J E

Žalba se odbija.

O b r a z l o Ź e n j e

Rješenjem Centralne izborne komisije Bosne i Hercegovine, broj i datum navedeni u uvodu, nije data saglasnost na Odluku Općinskog vijeća Domaljevac-Šamac broj 04-05-869/17 od 31.03.2017. godine u dijelu kojim je za člana Općinske izborne komisije/povjerenstva općine Domaljevac-Šamac imenovan Mario Ćošković.

Žalitelj je blagovremeno uložio žalbu na navedeno rješenje zbog netačno utvrđenog činjeničnog stanja i pogrešne primjene materijalnog prava. Ističe da je nesporno da je sudjelovao kao kandidat na lokalnim izborima 2016. godine, a da je proces imenovanja OIK Domaljevac-Šamac počeo 2017. godine, iz čega proizlazi da mu se neutemeljeno stavlja nateret da je prekršio član 2.3 stav (1) tačka 4. Izbornog zakona BiH, s obzirom da u trenutku imenovanja pomenute OIK nije kandidat za izbore, niti član bilo koje političke opcije. Također, ističe i da je druga imenovana kandidatkinja za članstvo u OIK Domaljevac –Šamac, Vesna Anđić bila kandidatkinja na Lokalnim izborima 2012. godine.

U odgovoru na žalbu Centralna izborna komisija Bosne i Hercegovine (CIK BiH) je predložila da se žalba odbije kao neosnovana.

Žalba nije osnovana.

Rješenjem Centralne izborne komisije broj: 06-1-07-1-77/16 od 26.04.2017. godine nije data saglasnost na odluku Općinskog vijeća Domaljevac-Šamac broj 04-05-869/17 od 31.03.2017. godine, kojom je za člana Općinske izborne komisije Domaljevac-Šamac imenovan Mario Ćošković. Osporeno rješenje je doneseno nakon pravilnog i tačno utvrđenog činjeničnog stanja i pravilne primjene materijalnog prava. Naime, imenovanje članova općinske izborne komisije vrši Općinsko vijeće, a saglasnost na rješenje o imenovanju daje Centralna izborna komisija BiH. Za člana izborne komisije ili biračkog odbora ne može biti imenovano lice koje je kandidat za

izbore za bilo koji nivo vlasti, kako to propisuje odredba člana 2.3. stav 1. tačka 4. Izbornog zakona BiH (Sl. glasnik BiH 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 1/06, 24/06, 32/07, 33/08, 37/08, 32/10, 18/13 i 7/14). Pravilno je CIK BiH, nakon uvida u Odluku o potvrđivanju i objavljivanju izbornih rezultata Lokalnih izbora u BiH 2016. godine („Službeni glasnik BiH“, broj 82/16) utvrdila relevantnu činjenicu da je žalitelj učestvovao u svojstvu kandidata ispred političkog subjekta HDZ 1990 na Lokalnim izborima 2016. godine, za Općinsko vijeće Domaljevac-Šamac, kao i da je navedena politička partija osvojila 4 mandata u Općinskom vijeću Domaljevac-Šamac.

Navedena odredba propisuje da za člana izborne komisije ne može biti imenovano lice koje je kandidat za izbore za bilo koji nivo vlasti. Nesporno je da se Ćošković Mario nalazila na kandidatskoj listi u svojstvu kandidata ispred političkog subjekta HDZ 1990 na Lokalnim izborima 2016. godine, za Općinsko vijeće Domaljevac-Šamac, kao i da je navedena lista ovjerena od strane Centralne izborne komisije BiH. Nakon izvršene ovjere kandidatskih lista, u smislu odredbe člana 4.21 stav 4. Izbornog zakona BiH, politička stranka, koalicija ili lista nezavisnih kandidata ne mogu mijenjati kandidatsku listu sve do isteka mandata organa. To iz razloga, što ako mandat kandidata sa liste političke stranke prestane u skladu sa članom 1.10 Izbornog zakona, mandat se dodjeljuje slijedećem kandidatu u skladu sa članom 13.5. stav 4 Izbornog zakona, a sve u cilju osiguranja kontinuiteta rada organa vlasti u slučaju prestanka mandata izabranom nosiocu mandata. Stoga i ne stoji tvrdnja žalitelja da na prethodnim lokalnim izborima nije dobio mandat za Općinsko vijeće Domaljevac-Šamac. Što se tiče žalbenog prigovora da je druga imenovana kandidatkinja za članstvo u OIK Domaljevac –Šamac, Vesna Anđić bila kandidatkinja na Lokalnim izborima 2012. godine, ovo apelaciono vijeće Suda Bosne i Hercegovine nalazi da je ista tvrdnja irelevantna, s obzirom da je mandatni saziv Općinskog vijeća Domaljevac-Šamac 2012-2016. godine prestao, te da imenovana nije bila kandidatkinja za Izbore 2016. godine.

Iz navedenih razloga Apelaciono vijeće nalazi da je pobijano rješenje Centralne izborne komisije Bosne i Hercegovine pravilno i zakonito, a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, br. 19/02, 88/07, 83/08 i 74/10) valjalo odbiti.

Predsjednik vijeća
Sudija
Zvezdana Antonović